

Нюп

Нюп

Нюп

11
2017

6+

ISSN 0207 - 6543

КЪАЙСЫННЫ ЖЮЗЖЫЛЛЫКЪ КЮНЛЕРИ

Къайсынны 100-жыллыкъ кюнлери аяз къакъгъанча кетдиле. Не къалды эсде? Нальчикде Къайсынны орамында майданы. Гюллеге тумаланган эсгермеси. Жыйылгъан халкъ. Къайсынны назмуларын келден айтхан сабийле. Чегем шахарда арт жыллада жашагъан юйю-музейи. Къайсынны туугъан эли, Огъары Чегем. Къайсынны Таш Китабы. Тау элледен жыйылгъан халкъ. Къыралны жер-жеринден келген къонакъла. Къайсыннга айтылгъан суймеклик. Ыразылыкъ. Аламлыгъы ючюн. Фахмусу ючюн. Туугъан Жери ючюн алгъыш, ыспас, бюсюреу. Сый, Намыс, Хурмет. Бары да – жеринде.

Алай бир мудахлыкъ, бир шургу кетерге унамай эди жүрекден. Жетишмей эди бир зат, бир жарыкъ, бир жылыу. Жүрек кюсеген. Эсинг излеген.

Къайсынны Кюню толу тюйюл эди...

Аны толтурлукъ жаланда Къайсын кеси эди. Ол эди жылытырыкъ, жарытырыкъ да. Къанатландырлыкъ, учурлукъ.

Уллу назмучу болмагъан жерде къатышды хар зат – агъы, къарасы да, аманы, игиси да. Уллу назмучу кезюнго ачады жашаугъа, билдирип къояды къараны бла акъны, аманны бла игини арасын, шарт белгилеп.

Уллу назмучу келип кетген жер а – шуулдап къалады.

Къайсынны сёзю халкъ жүрегинде шуулдап, жылытып, жарытып турлукъ жарыкъды, огъурлулукъду, энтта кеп жюз жылла озсала да.

Эсибизни жыйдыргъан, кесибизни кесибизге ангылатхан Акъ Сёзю жашап турлукъду Къайсынны, Ана тилибиз, Ата журтубуз жашагъан къадар.

«НЮР»



АТАГЪА АХТЫНА

Шургу

*...Къыйынды тау жол. Къарангы кече.
Чыракъ жарыкъ эслейме. Эгечим
Бу къыш кече, къайгъы эте манга,
Кёз къысмайын чыгъа болур тангга.*



Ата журтун къарап бир кёрмеген жашчыкъ, чыбыкъ атчыгъына да минип, атасыны къолундан тутханлай чабады. Чабады Азияны къужур да, сейирлик да базарында. Хууанла сатхан киши уа, жан-жанына кезиу-кезиу айланып: «Мод даю! Мод даю!» деп къычырады.

«Бал хууанла! Бал хууанла!» дегенлиги эди. Аны бир тохтатмай алай этип тургъаны хычыуун кёрюнюп, ата кюледи, къууанады. Сора, хууанчыны къатына барып, алады аны «модун» – ариу ийисден къыргъан зугул хууанын. О-о, къаллай насып эди ол манга! Алай не мен, не атам, билмей эдик аны алайлыгъын...

– Ата, къар къайда жашайды?

– Кёкде, балам.

– Кёг'а къайда жашайды?

Ата, не жауап этерге билмей, тынгылайды, апчыйды. Аллай бош соруучукъ аны былай абызыратханына сейир этип, амалсыз ышарады...

Жомакъгъа ушагъан Югославияда, Адриатиканы кёк жагъасында, чыганлыла тутхан чайханада жассы заманда эки шайыр олтура эдиле. Бири Семён Кирсанов, бири уа – Къули Къайсын. Ала шайырла кенгешине келгендиле. Къонакъбай чайханада уа чыганлыла, адетлерин бузмай, жырлайдыла, тепсейдиле. Той-оюн, жарыкълыкъ чайханагъа сыйынмай, алай.

Ата-баба төрелериндеча, къолгъа юйренген айыулары да бар. Аллында ийилип, баш ура, тепсей да билген, эки арт аягъына туруп, «къолун» узатып къабар затчыкъ да тилеген. Жаланда селеше билмейди, сора жырлай... Анга уа айыуну чыганлыла окъуна юйреталмагъандыла.

Бир азат жаныуаргъа аллай учузлукъ чекдире тургъанларын кёрген къалай тёзсюн анга?! Къайсын да тёзмедиди. Ол, анда олтургъанланы барысын да сей-



ирге къалдыра, жеринден туруп барып, ахыр сомуна дери чыгъарды да, зауаллы жаныуарны чыганлыладан сатып алды...

Къайсын айыуну баш бауундан тутханлай, тангнга дери айландырды жукугъа батхан шахарны шум тутхан орамларында.

Танг атханда уа, Совет Союздан келген турист къауумдан биреулен, Къайсынны танып:

– Къайсын?! Къайры элтип бараса бу айыуну? – деп сорду.

– Азатлыкъгъа! – деди атам.

...Не медет! Башха амал болмай, айыуну бошлап къояргъа тюшдю. Ол да иелерине къайтып келди. Чыганлыла биле эдиле айыуну къонакъ юйге жибермезликлерин да, аны ючюн, уллу къайгъы этмей, айыуну къайтырын сакълап тура эдиле, аны къайтып келлигине аз да ишекли болмай...

Вагнерни къайгъылы, шургулу музыкасы хауаны титирете, терезеден ычхынып, тегерекге жайыла эди.

Биз а – атам Къайсын, юй бийчем Оля, мен, арбазда олтуруп, аны тыкъсыгъан, сытылгъан музыкасына тынгылайбыз.

Ингир эди. Бир заманда тегерек шош болду. Жаланда насыпсыз Вагнер тынчаялмай эди...

Бюгюн да ангылаялмайма: Шопен, Моцарт, Бетховен болмай, бу Вагнер нек кире эди ангыбызгъа? Огъесе ол болмай къалмазлыкъ бир уллу палахны белгисими болур эди бизге? Бир уллу оюлууну? Билмейме. Болсада ол заманда насып деген зат бар эди. Огъесе атабыз бла бирге болгъан чагъыбыз ахыр насыбыбызмы болур эди?

Къачан эсе да, киши жеринде ол биз «мод» сатып алгъан заманыбызда, насыпны ангыламай къалгъаныбыздача, бусагъатда да сезмей эдик къыйынлыкъ, жууукъ келип, бетибизге солуй тургъанын. Ол кече Чегемден къарап керюннген Нальчикни терезелеринден ургъан чыракъ жарыгъына, шош орамларына синге тургъанын...

Баям, Вагнер аны ачы белгисин бере болур эди бизге. Биз а ангыламагъан эдик аны. Ангыламагъан эдик...

*Орус тилден
САБАНЧЫЛАНЫ Арипа
кечюргенди*



БИЗГЕ ЖАЗАДЫЛА

Багъалы редакция!

Биз, Экинчи Чегемни биринчи номерли орта школуну окъуучулары, «Нюр» журналны бек суйюп окъуйбуз, хар айдан ашыгъып сакълап да турабыз.

Къалай игиди бу «Нюрню» чыгъып тургъаны! Сабийлеге уллу саугъа! Бирбирле бизге сейир да этедиле: «Нюр» гитчелегеди, сиз а – сегизинчи классда окъуйсуз аны», – деп. Биз а алагъа сейир этебиз – «Нюрню» окъусала, алай айтмаз эдиле! Гитчеге, уллугъа да къаллай алапат затла бардыла анда! Биз эшитмеген нарт сёзле, сейирлик жомакъла, хапарла. Анса уа таурухла уа, тамашалы нарт таурухла! «Нюрде» болмаса, биз бир жерде да окъумагъан, билмеген!

Сёзберлени уа, жауапларын ким алгъа табар деп, уллу эришиу къураучубуз. Алайды да, Жангы жылгъа «Нюрге» жазылыргъа унутмагъыз! Биз жазылгъанбыз. Бек сау болугъуз, НЮР жайгъанла! Ишигизден къууаныгъыз!

*АЙТЕКЛАНЫ Джамия, УЗЕЛАНЫ Амина,
Экинчи Чегемде 1-чи школну окъуучулары*

Ахматланы Ахматны жашы Муссага быйыл 80 жыл болукъ эди, медет. Сабийлей, школга журюп башлар жыл санында, халкъ бла бирге сургюннге ашырылган телюденди. Болсада, кечгюнчюлюк азабын билимге жан атханы бла, къаты иши бла хорлагъанладанды.

300-ден артыкъ илму иш жазгъанды. Жаш телюге сакъ эди. Муссаны кюнчюнден бийик билимли болганла жюзле бла саналадыла. Биринчиле санында болуп, техника илмуланы доктору, профессор деген даражага чыкыган эди. Техника билими болганлыкыга, ана тилни ариулугун сезген, назмучулукыга тартдырган журеги бар эди. Назму жазды деп сау заманында киши да билмегенди. Да ма, сабийлеге жазган бир назмусу.

«НЮР»



АХМАТЛАНЫ Мусса


КЮЗ АРТЫ

Кюз артында сууукъла
Таудан къаты уралла,
Жылы жерлеге учуп
Къанатлыла баралла.

Кекчапыракъ терекле
Саргъыл бола башлайла,
Гюл ёзенле, этекле
Къууатларын ташлайла.

Элпек битген тирликни
Ындырлагъа жыялла,
Солуу алган ёзенни
Сабан ызга жыралла.

Жаун, балчыкъ демейин,
Будай, арпа себелле.
Жаз башына кегерип
Ёсерлерин сезелле.





ЖАШ ЖАЗЫУЧУЛА КЕНГЕШИНДЕ

жазыучу Якуп Омероглу, культура бла туризмни министри Наби Авчи эм Тюрк жазыучула бирлигини консультанты Ильяс Эрен, дагыда башхала бла.

Андан сора да башха Тюрк кыралладан келген жаш жазыучулары таныдым. Не жазгъанларын, къалай жазгъанларын кёрдюм, билдим. Сёлешдик, ушакъла этдик, назмула окъудукъ. Атлары айтылгъан жазыучула назмучулукъну онгларыны юсюнден кёп айтдыла. Назмуларыбызгъа тынгыладыла, сюздюле.

Шахаргъа шагъырей этдиле, кёп сейирлик жерледе айландырдыла, бурнугулу Стамбулну тарых жашауундан кёп жангы затла эшитдим. Ол төрт кюнню ичинде бир тамаша жомакъгъа кирип чыкъгъанча, узакъ ёмюрлеге барып къайтханча кёрюндюм кесиме. Бир башха дунягъа кёз ачханча...

Бу жолоучулукъ манга уллу къууанч да, дерс да болду.

Аланы жазыу төрелери малкъар назмучулукъдан бираз башхаракъ болса да, анда кёргенимча, ала юйретгенча жазып жазып кёрюрге деп турама.

**БАЙТУУГЪАНЛАНЫ Исмайыл,
Тёбен Чегем**

Турцияны культура эм туризм министрствосу бла Евразияны жазыучула бирлиги къурап, Тюрк дуняны жаш жазыучулары Стамбулда тюбешдиле. Аллахны ахшылыгъы бла анда мен да болдум.

Бизге бек жарыкъ тюбедиле. Аэропортха тийишгенибизлей: «Къарачай-Малкъардан келгенле?!» – деп, соруп, аллыбызгъа чыгъып, къууанып, «хошкелди айтып, къучакълап, бирда сейирлик этдиле.

Кёп белгили жазыучу бла танышдым. Аланы санында: тюрк шайыры Алий Акбаш, Евразияны жазыучула бирлигини башчысы, азербайджанлы



КЪУЛИ КЪАЙСЫННЫ 100-ЖЫЛЛЫГЪЫНА

ЖЮЗЖЫЛЛЫКЪНЫ БАШЫНДАН КЪАРАГЪАН ЗАКИЙЛЕ

Къарачай-Черкес республиканы школлары бары да къарачай-малкъар халкъны закий поэтлери Къули Къайсын бла Байрамукъланы Халиматны 100-жыллыкъларына атагъан дерсле, дерсден тышында байрамла къурап бардыргъандыла.

Устазланы билимлерин ёсдюрген институтну ана тилле бла адабият кафедрасы къарачай-малкъар тилде чыкъгъан «Нюр» журналны редакциясы бла бирге (баш редакторну къуллугъунда – Сабанчыланы Арипа) республикалы даражада «Жюзжыллыкъны башындан къарагъан закийле» деген ат бла уллу байрам иш бадырдыла. Республиканы шахар, эл школларындан келген сохтала, ол эки да закийни назмуларын кёлленип окъудула, аланы сёзлерине жазыл-

гъан жырла айтдыла. Къули Къайсын бла Байрамукъланы Халиматны жазылып сакъланган ауазларына тынгыладыла.

Байрамны ахырында уа сохталагъа да, аланы алай ариу юйретген устазлагъа да махтау къагъытла берилди. Андан тышында да «Нюр» журналны талай номери бла, Къайсынны китаплары бла саугъаландыла.

Устазла, сохтала да «Нюр» журналны кёрюп къууангандыла, хар чыкъгъан санын къалай алып турургъа боллугъун да соргъандыла.

МАМАЛАНЫ Фатимат,
*Къарачай-Черкес республиканы
Устазланы билимлерин ёсдюрген
институтну ана тилле бла
адабият кафедрасыны башчысы*





Рахайланы Амина



Темиркѳанланы Алия



Мокѳаланы Гюлнара



Аксийланы Ильнара



Бѳзюланы Лейла

КЪУЛИ КЪАЙСЫННЫ ХУРМЕТИНЕ ХАНТ КЪАНГА

Къабарты-Малкъарны жеринде, андан тышында да, Къули Къайсынны 100-жыллыгы бла байламлы тюрлю-тюрлю байрам ишле этиледиле. Мокъаланы Гюлнара да, ол байрамгъа атап, сабийлени хунерлерин ачыкъларча, уллу эришиу къурап бардыргъанды.

Таулу къызчыкъла, алтыдан башлап, он жыллыкълагъа дери, бир ненча тюрлю хунерден къол усталыкъларын кѳргюзтгендиле. Назму окъуп, жыр айтып, тепсеп, аш-суу хазырлап да эришгендиле.

Ол эришиуге «Нюр» журналны да чакъыргъан эдиле. Ол да, бу ишге ыразы болуп, къууанып, сабийлеге сау-гъала, алгъыш къагъытла да хазырлап баргъанды.

Эришиуге багъа бичериклени санында белгили назмучу Ёлмезланы Мурадин, кийим устасы (модельер) Шаханланы Фариза, Къабарты-Малкъарны культурасыны сыйлы къуллукъчусу Созайланы Элияс, «Эльбрусидни» келечиси Ахметланы Артур, дагъыда башхала бар эдиле.

Сабийле, бир бири ызындан чыгъып, Къули Къайсынны назмуларын окъудула, бешик жырчыкъла айтдыла, тепседиле. Андан сора къызчыкъла хычин этип да эришдиле. Аналары иш да болушуп...





**Биринчи жерни алгъан
Рахайланы Аминаны саугъалары**

Къызчыкъла бары да саугъала бла алгъыш къагъыт къоллу болдула. Ала ны жетиси айырмалыгъа саналды. Биринчи жерге уа Рахайланы Амина чыкъды.

«Къаллай аламант эришиу болду! Сиз хар биригиз да бирер юйорню жарыкъ жулдузчукъларысыз. Хунеригиз да анга кере болду. Хар башлагъан ишигиз да ма былай къууанч бла башлансын, саулукълу, юлпюлю сабийле болуп ёсююз!» – деди ким да ауазындан сормаи таныучу халкъ ийнагъы Созайланы Элияс.

Ёлмезланы Мурадин да хорлагъан къызчыкълагъа ариу жаращдырылып чыкъгъан назму китапларын саугъагъа берди.

Биз да бу хунерли къызчыкъланы былай ариу ёсдюрген ата-аналагъа ыспас сёзюбюзню айта, «НЮР» журналны атындан жүрек ыразылыгъыбызны билдирдик. Бу огъурлу ишни къурагъаны ючюн Мокъланы Гюлнара да тутхан ишинде бет жарыкълы болсун дедик!

Ахырында Къули Къайсынны 100-жыллык хурметине Таулу хычинледен хант къанга къурап, къонакъланы сыйлагъандыла. Ала да уллу алгъыш, бюсюреу-ыспас этдиле. Быллай эришиулени терк-терк бардыра турурларын тиледиле.

САБАНЧЫЛАНЫ Арипа



Улбаисланы Эльмира



Фрийланы Малика



Шидакъланы Мариям



Жарайсууланы Амалия



*Жъайсынны арбазында
назмурланы бек ариу айтханла:*

ЁЛМЕЗЛАНЫ Муралин

КЪАЙСЫННЫ ЭСКИ АРБАЗЫНДА

Къайсынны эски арбазында
Энтта шапталчыкъ ариу чакъгъанды,
Юсюне эрттен кюню къакъгъанды
Чегемни жомакъча жазында.

Къайсынны назмусундача, кюн
Жайыла, чёрчек аяз уралды,
Биягъы жашчыкъ жырлай баралды,
Жортдуруп тири эшекчигин.

Къайсынны эски арбазында,
Акъ булутча, шапталчыкъ тазады.
Юллесин тарта, сабыр озады
Чал аппа эшек арбасында.

Къайсынны назмусундача, чыкъ
Минг тюрлю жаналды, жылтырайды,
Бузоучукъ бла зауукъ ойнайды
Биягъы жаланаякъ жашчыкъ.

Ачылгъан китап – Чегем тары.
Къаяла, чучхур, атлы, суу, жол...
Къайсынны «Жер китабыды» ол –
Малкъаргъа, сау дуниягъа жыры.

Къайсынны эски арбазында
Сюелебиз – терекчик да, мен да.
Ол, кызчыкъча, къууанчлыды энди,
Бутакъчыкъ чагъа... жарасында.



Гехов Искандер бла Мансур



Аджиланы Ноэль



Байчеккуланы Алина



ЭКИ МАКЪА

Эки макъа туруучу кёлню суу кьуругъанды да, энди уа не хадагъа этейик деп, экиси да бир башха кёл излей чыкьгъандыла. Бир кьуюгъа келгендиле. Бирлери, кеп сагъыш эте турмай, кьую ичине чынгаргъа дегенди. Башхасы уа айтханды: «Муну суу да кьуруса уа, артда биз бери кьалай чыгъаллыкьбыз?»

Алгъадан сагъыш этмей, иш башламазгъа юйретеди тамсил.



АКЪАЙЛАНЫ Алия

Кюз арты жетди бизге,
Чапыракъла тюшедиле.
Айыучукъла, ашыгъып,
Куркалагъа киредиле.

Къоянчыкъла къалтырап,
Секиредиле къыстау.
Мен да, сууукъчукъ болуп,
Терк чабама юйюме.





Къулийланы Къайсынны мен китапдан таныдым,
Ол жашагъан ёмюрде мен дунягъа туумадым.
Чегем сууунлай, ариу аны бизге тилеги.
Биз аны назмуларын окъуйбуз кёлден, суююп,
Жашауда хайырлана, жашайбыз эзде тутуп.



БАТТАЛАНЫ Мариям,
Нальчик шахарны 3-чю школу, 4-чю класс

КЪАЙСЫН БЛА БИР ЁМЮРДЕ ЖАШАМАГЪАНЫНА ЖАРСЫГЪАН КЪЫЗЧЫКЪ

Бу къызчыкъгъа аппасыны анасыны атын атагъандыла. Назмусунда Къайсын бла бир ёмюрде жашамагъанына жарсыйды. Къайсын бла бир ёмюрде жашагъанлыкъгъа, уллу ыннасы окъуялмай къалгъанды. Алай аны къарындашы Мусукланы Оюс а урушха дери Огъары Малкъарны А.С. Пушкин атлы школунда Совет Союзну Жигити Уммайланы Мухажир бла бирге устаз болуп ишлегенди. Оюсну атасы Хасим эфенди Мёчюланы Кязимни таныгъанды. Оюсну сохтасы Мусукланы Рамазаннга атап, Кязим хажи назму да жазгъанды. Къызчыкъны ана жанындан уллу аппасы уа Ленинни ордени бла саугъаланнган Таукенланы Магомет эди. Аппасы Батталаны Солтан Огъары Малкъарны



эки орта школунда да кезиу-кезиу, математи-кадан окъутуп тургъанды.

Окъугъан жери да алай бош сунмагъыз!

Нальчикде ол окъугъан 3-чю школну къурулушунда ишлегенди Мамайланы Алий, Мариямны эки аппасыны да къарындашы, жазыучу, журналист. Ол себепденди къызчыкъны хар дерсге

хазырланып баргъаны, билимге итиннгени. Башха тюрлю болур амалы да жокъду!

Къайсын бла бирге ол къыйынлы ёмюрде туумагъанынга жарсыма, балачыкъ! Уллу ыннангча, Мариям атынга кир къондурмай, Къайсынча белгили болуп, назмуларынг бла, иги окъугъанынг бла бизни къууандыра, кёп жаша!

АЛИЙЛАНЫ Мамай



Бир жол эки эринчек агъачха баргъандыла да, бир алма терек кѳргендиле. Терек башында да – уллу кызыл алмала, бишип.

Была экиси да ач болгъандыла. Бири айтханды:

– Терекни къагъайыкъ да, алмала ашайыкъ! – дегенди.

– Къагъа да кюрешмей, тюбюне жатып, ауузларыбызны ачсакъ, алмала кеслери тюшерикдиле! – дегенди экинчиси.

Жатхандыла экиси да терек тюбюне.

Тургъандыла, ауузларын ачып.

Бири айтханды:

– Ауузубузгъа тюшсе, чайнаргъамы керек боллукъду?

– Да, хоу, – дегенди башхасы.

– Къой, кетдик сора, – дегенди да...

Эки эринчек да, эрингенден, алайда кѳтюрюлалмай, ачдан ёлюп къалгъандыла деп, ётюрюк, керти эсе да, хапар алайды.

ЧУУ-ЧУУ, ЧУУ АЛА...

ЫРА-МАЗАН

Ыра-мазан –
Сыра къазан,
Кёрпе тикген,
Аякъ бюкген.
Темир тёшде
Отун жаргъан,
«Тохта!» – десенг,
Жортуп баргъан.
Жилтин кёзлю,
Къалын къашлы,
Тургъан ююю –
Гетен башлы.
Къужур сёзлю,
Къужур халлы,
Миннген аты –
Агъач наллы,
Ичген суу –
Тузлу шаудан,
Жатхан жери –
Мырдыкъаудан.



СЁЗБЕР

1		2		3		
4		5		6		7
8				9		
		10	11			
12						13
14						



ЭНИНЕ: 1. Атаны атын кўбултуп айтырла. 5. Къайсынны китабыны аты: «Жаралы ...». 8. Желчик не эте туруучуду? 9. Жарлыны не заты аллына келсе, бурну къанар? 10. Жылны бек жылы чагъы. 14. «Тур-турдан» хапар келсе, жукъудан не къалмаз?

ЁРЕСИНЕ: 1. Аны орнуна кюн чыкъмаз. 2. Аны къолу ачитмаз. 3. Къаллай къарынны токъ билмез? 4. Къанатсыз болмаз. 5. Патчахны бёркю. 6. Айраны болмагъан аны ичер. 7. Ол кетмей, къар кетмез. 11. Кертилигине шагъатха этерле. 12. Ол – юрюр, жел – элтир. 13. Ары чабакъ да тюшеди, чыпчыкъ да тюшеди, къызла башларына да къысадыла, аны артына да бугъадыла.

10-чу санында (2017) басмаланган СЁЗБЕРНИ ЖАУАБЫ

ЭНИНЕ: 1. Чегем. 3. Салам. 5. Жашау. 7. Арба. 8. Сант. 9. Асыу. 10. Алты. 12. Намаз. 15. Харун. 16. Лейла.

ЁРЕСИНЕ: 1. Чокка. 2. Макъа. 3. Сыра. 4. Мажит. 5. Жауун. 6. Устаз. 9. Аллах. 11. Ызына. 13. Азан. 14. Асыл.

Ежемесячный литературно-художественный журнал для детей «НЮР» («Свет») № 11-2017 г.

Выходит с января 1982 года. На балкарском языке

Учредители:
Министерство культуры КБР, Общественная организация «Союз писателей КБР».

И.о. главного редактора
А. А. САБАНЧЕВА

Редколлегия:
А. БЕГНОВ
М. БЕШТАЕВ
Т. БИГТИРОВА
Ж. ГУЗЕЕВ
Ф. МАМАЕВА
А. МИШАЕВА
М. ОЛЬМЕЗОВ

Оформление
И. АККИЗОВОЙ

Компьютерный набор и верстка
А. БОЗНЕВОЙ

Свидетельство о регистрации
ПИ № ТУ 07 - 00102 от 24.12.2014 г.
Управление Федеральной службы по надзору в сфере связи, информационных технологий и массовых коммуникаций по КБР

Подписано в печать

16.11.2017 г.

Выход в свет

30.11.2017 г.

Формат 60x90 3/8

Бумага мелованная

Гарнитура литературная

журнальная рубленая

Печать офсетная

Усл. кр.-отг. 8.

Усл. печ. л. 2.

Уч.-изд. л. 2,7.

Тираж 865 экз.

Заказ № 134

Индекс 73908

Стоимость одного номера по подписке через ФГУП «Почта Россия» – 13,87 руб., за 6 месяцев – 83,22 руб.

Адрес редакции: 360017, г. Нальчик, пр. Ленина, 5. Тел.: 42-37-27; 42-14-19. zhurnal_nyr@mail.ru

Адрес издателя: 360017 г. Нальчик, пр. Ленина, 5. ГКУ «КБР-Медиа». Дом печати.

Отпечатано в типографии ООО «Тетраграф» 360000, КБР, г. Нальчик, пр. Ленина, 33

Отпечатано в полном соответствии с качеством предоставленного электронного оригинал-макета.

КЪУЛИ КЪАЙСЫН

– Жашау! Адамны сен нек поэт этдинг, Къоймай мал кютюп, сабан да сюрюрге?

– Эрлай къутургъан черекледен ётюп, Къарагъа – къара, акъгъа уа акъ дерге.

– Нек бергенсе поэтге сёзню кючюн, Жукъусуз этер кибик кечелерин?

– Дайым аманнга аманды дер ючюн, Игиге – игиди дер ючюн бердим.

– Жашау, айт, кёзбау керекмиди санга, Поэтден да аллай затмы излейсе сен?

– Жокъ! Тюзюн айтса – ма ол болур саугъа, Олду, ол поэт деген алай этсе.

– Да, кючю жетерми ол тукъум затха? Инсанынгды ол да, оноун сен эт!

– Жыгъылырма деп къоркъгъан минмез атха, Аллайны мен этмедим ушайд да поэт!..

2018 жылда да «НЮРНЮ» алып турургъа скойгенле, почтагъа барып, жазылыргъа боллукъсуз. Багъасы – жарым жылгъа 100 сом жетмеген бирди. Школдо окъугъан сабийи болгъаннга, 1-чи, 10-чу класслада болса да, «НЮР» бек керекди. Анда басмаланган затлары сиз бир башха жерде табаллыкъ тюйюлсюз. Ала сизни балаларыгъызгъа бек болушурукъдула: тилни, адепни-къылыкъны билирге, тынгылы адам болуп ёсерге. Ол тукъум затла сизге багъалы эселе, жазылыгъыз.

Сорлугъу болгъан бу телефон бла сёлешигиз: 8-928-077-70-67.